



partii naleraq

Nuuk, 24. marts 2015

UPA2015/105

**Siunnersuut uunga: Meeqqanik pinerliisimanginnermut uppernarsaatinik
piumasaqaateqartussaataaneq pillugu Inatsisartut inatsisaata allanngortinnera pillugu
Inatsisartut inatsisaat nr. xx, xx xx 2015-imeersoq.**

(Atuuffiata annertusinera)

(Ilinniartitaanermut, Kultureqarnermut, Ilisimatusarnermut Ilageeqarnermillu Naalakkersuisoq)

Siullermeerneqarnera

Meeqqanik pinerliisimanginnermut uppernarsaatinik piunasaqaateqartussaataaneq pillugu atuuffiata annertusinissaanik inatsisip allanngortinneqarnissaanik siunnersuut Partii Naleqqaminngaaniit oqaaseqarfigissavarput.

Meerartatta nunatsinni toqqissisimallutik paarilluarneqarlutillu peroriartornissaat tamatta inuiaqatigiit iluanni pisussaaffigaarput, akisussaassuseqartumillu meeqqat ataqqineqarlutik nuannaarlutik ineriartornissaat ikiorneqarnissaallu aqutissiuutissallutigit.

Meeraalluni toqqissilluni peroriartortitaalluni pilluarnarluinnartoq amerlasoorpassuulluta misiginikkuarput aataakkut, aanaakkut, ittukut, ningiukut angajoqqaallumi asanninnerat misigalugu pilluarnarluinnartoq qanilaarnermik asanninnermillu kinguaaminnut tunniussisarnerat inuunerup sinneranut puigunngisaannassavarput.

Qanortorlu asanninneq tunissutisiarput tamatta pisussaaffittut tigullugu siaruartertigu, ukiunimi makkunani tullimut asanninneq ajoraluartumik qimakkiartuinnarparput.

Inuiaqatigiit siunissamut ingerlariaqqinnissaanni meeqqat inuusuttullu isumagissagaat oqartarpugut, meeqqammi inuusuttullu nunatta siunissarigai nunatsinni oqaasinnaaraarput.

Taamaattumik meeqqat inuusuttullu suliniarfigineqarneranni pitsaasumik tunngavissiiinissaq pingaartorujussuusoq Partii Naleqqamiit oqaatigerusupparput.

Meeqqanik meeqqanullu pinerliisarneq kinguaassiuutitigullu atonerluisarneq ingasalluinnartumik nunatsinni ajornartorsiuutigaarput, taamatummi pisoqartillugu tamatta eqqorneqartarpugut, pingaartumillu meeqqat eqqorneqartillugit, meerannguimmi inuunerat innarlerujussuarneqartarpoq.

Taamatullu pisoqartarnera inuunermi sinnerani nassartuagassaminnik artorsaatissinneqartarput, timikkut tarnikkullu innarlerneqarlutik puigugassarinnngisaminnik naalliuutissinneqartarput, taamaamat meeqqanik pinerliisarnerit atornerluisarnerillu akuerineqarsinnaanngilluinnarput.

Meeqqanik pinerliisimanninnermut uppersarsaatinik meeqqani sullissiviusunik tamani pinerliisimanninnermut uppersarsaammik sulisut takutitassaqaalernissaat tamakkiisumik Partii Naleqqamiit taperserparput.

Taamaaliornikkummi qulakkeerniarneqarmat meeqqat illersorneqarlutik innarlitsaalineqarnissaat, meeqqat pinerluffigineqannginnissaat angunianiarlugu inatsisitigut sukaterineq Partii Naleqqamiit tapersersorluinnarparput.

Meeqqanik sullissivimmi tamani kiisalu aamma angerlarsimaffinni paarsisartuni meeqqanut pinerliisimanninnermut uppersarsaatinik peqarluni sullissinissamik piumassaqaartussaaitaneq inatsisikkut sakkortusarneqartoq eqqunneqartussanngormat nuannaarutigaarput, tamakkiisumillu nakkutilliinikkut atuuttussanngortinneqarlermat Partii Naleqqamiit iluarisimaarlugu oqaatigissavarput.

Meerartatsinnut nunatsinni sumiginnaanerit atornerluinerillu ilungersunartorpassuarnik nassataqartartut tamatta ilisimalluarparput, ilaqutariippassuarnillu taamatut eqquisarnerit ajorluinnarput, tassami imigassamik ikiaroorntumillu atornerluinerit nunatsinni annertoqaat, tamakkulu kingunerisaanik ilaqutariinni tamatta taakkuninnga ajornartorsiutinik kallarneqarsimalluta oqassagutta assortoruminaalluinnarpoq.

Imigassartorpallaanerup inuttullu ajornartorsiutit annertuallaarnerisa kinguneraat meerartatsinnik sumiginnaaneq ilaqutariinni ajornartorsiortuni annertummat, tamannalu ajorluinnarpoq.

Naak meeqqat suliniarfigineqarnerat annertugaluqisoq, massakkumut sullissinerit amigartorujussuurtut isikkoqarmata, uffalu sullissisut ilungersorlutik sullissigaluurtut, taamatullu ajornartorsiuteqaannavilluta ingerlanerput akuerinnarsinnaajunnaarparput.

Aammalu ukiuni makkunani ilaqutariippassuit meerartallit inuttut aningaasaqarniarnikkullu ajornartorsiorterit pissutigalugit inigisaminnik aniatinneqartut amerliartuinnarput.

Ilaqutariit meerartaat angerlarsimaffeqanngitsuniittut atugarliornartunik pitsaanngitsunillu avatangiiseqarlutik inuusarput, tamannalu meeqqap pisinnaatitaaffianik innarliivoq. Allaallu siunissami inersimasunngornissamat pitsaasumillu inuuneqarnissamat ilinniagaqarnissamullu assut innarliinerat takoreerneqarsinnaallutik.

Tamannalu akuerineqarsinnaanngitsoq Partii Naleqqamiit oqaatigissavarput atugassarititaasullu meeqqat illersuisuata sakkortuumik uparuaaffigalugit aqqissuuteqarfiginissaat Inatsisartunut Naalakkersuisunullu oqaaseqarfigisariaqarai kissaatigaarput.

Meeqqammi pisinnaatitaaffii oqaasinnaanngitsumik atuuttussatut aqqinniartariaqartut Partii Naleqqamiit piumasarilluinnarparput.

Kiisalu ilaqutariinni meerartalinni meerartaqanngitsunilu suliffissaaleqineq aningaasanillu isertitakippallaarneq aningaasassaaleqinerillu pissutigalugit meeqqat inuusuttullu piumassuserinngisaminnik piitsuussutsimik eqqorneqartarnerat akuerineqarsinnaanngilaq.

Tamannalumi aamma meeqqanut inuusuttunullu ajornartorsioreersunut pitsaanerulersitsinngilaq, inuuniarnikkummi ajornartoorfiulluinnartarmat ilaqutariit aningaasaqarnikkut isertitakippallaarnerat pissutigalugu, naak oqalukkaluarluta ullumikkut meeqqanik kaattoqassanngitsoq.

Ilaqutariit meerartallit avannaani, qeqqani, kujataani, tunumilu inuuniarnikkut ajornartorsiutillit ilaat inuuniarnikkut atugaat pitsaanerulersissinnaagaluarlugit alloriarsinnaannginnerput ilungersunaqaaq.

Tassami immitsinnut mattussorluta killilersuunnersuarput ilungersunartorsioortitsimmat, inuimmi pisinnaatitaaffiarlugit ingasattajaartumik aaqqissuussinerput aalisartitsiumanatalu piniartitsiumannginnerput aalisarnermik piniarnermillu inuussutissarsiutilinnut eqqinerlorujussuarnikummat pingaartumik meerartallit eqqarsaatigalugit.

Tamannalu pissutigalugu ilaqutariit meerartallit atugaat ilungersunartorujussuarmiitippagut meeqqammi inuussutissaqartinneqarlutik pisinnaatitaaffimmikkut illersorneqarnissaat pillugu piaartumik Inatsisartunit Naalakkersuisunillu aaqqinneqassasoq Partii Naleqqamiit piumasaralugu kissaatigaarput.

Soorunami qulaani taakkartukkagut aaqqinniassappata meeqqallu pinerlineqartartut ikinnerulissappata taava inuit angerlarsimaffeqarlutik suliffissaqarlutillu imminnullu pilersornermikkut inooqataanermikkullu pilluarnerulernissaat nuannaarnerulernissaallu aqutissiunniartariaqarmat.

Takorloorsinnaavarpummi pissutsit inuit atugaat pitsaanerulersikkutsigit ulluinnarnilu atukkagut oqinnerulersikkutsigit taava aamma qularnanngilaq meeqqanik pinerliinerit ikinnerulersisinnaagaluarigut. Inuimmi ingerlalluarneruleraangamik nuannaarnerulerlutillu pinerlunniarnerit igalassimanerulertarpaat.

Meeqqallu atugaat pitsaanerulissappata isumannaannerusumillu inuulissappata ajornartorsiuterpassuit inuunerlunnikkut pilersittakkagut ikilisarniartariaqarput tamakkulu akiorniarnissaanut ataatsimoorluta nikussaartariaqalerpugut.

Pisinnaatitaaffigut kisiisa ujartuinnarsinnaanngilagut aamma akisussaaffimmik tiguseqataasariaqalerpugut takutitsillutalu aatsaat taamaaliorutta uagutsinnut ikiorsinnaanngussaagut, taamaammat allannguilluinnartariaqarpugut!

Akisussaaffeqarnerput qimarratigiinnarsinnaajunnaarparput, ilagummi ajornartorsiorput meeranguit ikkatigineqartarnerat pinerluffigineqartarnerallu unitsilluinnartariaqarput.

Taamatut Partii Naleqqamiit oqaaseqarluta peqqinnissamut isumaginninnermullu ataatsimiititaliami suliarineqarnissaa innersuussutigaarput.